

**BOSNA I HERCEGOVINA
FEDERACIJA BOSNE I HERCEGOVINE
VLADA**

PRIJEDLOG

Z A K O N

**O IZMJENI I DOPUNI ZAKONA O PLAĆAMA I DRUGIM NAKNADAMA SUDIJA I
TUŽILACA U FEDERACIJI BOSNE I HERCEGOVINE**

Sarajevo, mart 2018. godine

PRIJEDLOG ZA DONOŠENJE ZAKONA PO SKRAĆENOM POSTUPKU

Postupajući u smislu odredaba člana 26. Poslovnika o radu Vlade Federacije Bosne i Hercegovine – Prečišćeni tekst („Službene novine Federacije BiH“, br. 6/10, 37/10 i 62/10) predlažemo donošenje Zakona o izmjeni i dopuni Zakona o plaćama i drugim naknadama sudija i tužilaca u Federaciji Bosne i Hercegovine po skraćenom postupku.

Kao osnovni razlog za donošenje ovog zakona po skraćenom postupku ističemo da se u konkretnom slučaju ne radi o složenom i opsežnom zakonu te da su u tom smislu ispunjeni uslovi iz člana 172. Poslovnika Predstavničkog doma Parlamenta Federacije Bosne i Hercegovine (“Službene novine Federacije BiH“, br. 69/07 i 2/08) i člana 164. Poslovnika o radu Doma naroda Parlamenta Federacije Bosne i Hercegovine (“Službene novine Federacije BiH“ br. 27/03 i 21/09).

Z A K O N

O IZMJENI I DOPUNI ZAKONA O PLAĆAMA I DRUGIM NAKNADAMA SUDIJA I TUŽILACA U FEDERACIJI BOSNE I HERCEGOVINE

Član 1.

U Zakonu o plaćama i drugim naknadama sudija i tužilaca u Federaciji Bosne i Hercegovine („Službene novine Federacije BiH“, br. 72/05, 22/09 i 55/13) u članu 1. iza stava 1. dodaje se novi stav 2. koji glasi:

„(2) Izuzetno od odredbe stava 1. ovog člana plaće i druge naknade sudija Ustavnog suda Federacije Bosne i Hercegovine uredit će se posebnim zakonom.“

Član 2.

U članu 2. tačka i) riječi: „Ustavnog suda Federacije Bosne i Hercegovine i sudije“, brišu se.

U tački j) riječi: „Ustavnog suda Federacije Bosne i Hercegovine i“, brišu se.

U tački k) riječi: „Za predsjednike Ustavnog suda Federacije Bosne i Hercegovine i“ zamjenjuju se riječima: „Za predsjednika“.

Član 3.

Ovaj zakon stupa na snagu osmog dana od dana objavljivanja u „Službenim novinama Federacije BiH“.

O B R A Z L O Ž E N J E

ZAKONA O IZMJENI I DOPUNI ZAKONA O PLAĆAMA I DRUGIM NAKNADAMA SUDIJA I TUŽILACA U FEDERACIJI BOSNE I HERCEGOVINE

I. – USTAVNI OSNOV

Ustavnopravni osnov za donošenje ovog zakona sadržan je u odredbi člana IV.A.20. (1) d) Ustava Federacije Bosne i Hercegovine, kojim je propisano, da je Parlament Federacije Bosne i Hercegovine nadležan za donošenje Zakona o vršenju funkcije federalne vlasti.

Ustavnopravni osnov za donošenje ovog zakona je utvrđen prilikom njegovog prvog usvajanja i ovaj zakon je do sada više puta mijenjan.

II. – RAZLOZI ZA DONOŠENJE ZAKONA

Postupajući u skladu sa Presudom Ustavnog suda Federacije Bosne i Hercegovine broj: U 16/16 od 26.04.2017. godine, kojom je utvrđeno da član 2. stav 1. tačka i) u dijelu koji glasi: „za sudije Ustavnog suda Federacije Bosne i Hercegovine“; tačka j) u dijelu koji glasi „Za šefove odjeljenja Ustavnog suda Federacije Bosne i Hercegovine“ i tačka k) u djelu koji glasi: „za predsjednika Ustavnog suda Federacije Bosne i Hercegovine“ Zakona o plaćama i drugim naknadama sudija i tužilaca u Federaciji Bosne i Hercegovine („Službene novine Federacije BiH“, br. 72/05, 22/09 i 55/13) nisu u saglasnosti sa Ustavom Federacije Bosne i Hercegovine.

III.- OBRAZLOŽENJE POJEDINIHZAKONSKIH RJEŠENJA

Ovim zakonskim prijedlogom dosljedno se provodi presuda Ustavnog suda Federacije Bosne i Hercegovine broj: U-16/16 od 26.04.2017. godine, na način definiran tačkom 2. dispozitiva navedene presude. Naime, Ustavni sud Federacije Bosne i Hercegovine naložio je Parlamentu Federacije Bosne i Hercegovine donošenje Zakona o Ustavnom sudu Federacije Bosne i Hercegovine kojim će razraditi samostalnost i upravno-materijalnu nezavisnost Ustavnog suda Federacije Bosne i Hercegovine, uključujući plaće i druga primanja sudija Ustavnog suda Federacije Bosne i Hercegovine. Dakle, ovim zakonskim prijedlogom sudije Ustavnog suda Federacije Bosne i Hercegovine isključuju se od primjene Zakona o plaćama i drugim naknadama sudija i tužilaca u Federaciji Bosne i Hercegovine, te se istovremeno tačka 2. dispozitiva navedene presude provodi donošenjem posebnog zakona o Ustavnom sudu Federacije Bosne i Hercegovine.

IV. – FINANSIJSKA SREDSTVA

Za provođenje ovog zakona nije potrebno osigurati dodatna finansijska sredstva u Budžetu Federacije BiH.

ODREDBE ZAKONA KOJE SE MIJENJAJU ODNOSNO DOPUNJUJU

Član 1. Okvir Zakona

Ovim Zakonom utvrđuju se plaće, naknade i druga materijalna prava sudija, tužilaca i stručnih saradnika u Federaciji Bosne i Hercegovine.

Član 2. Osnovna mjesečna plaća sudija

1. Osnovna mjesečna plaća sudija iznosi:

- a) Za sudije općinskih sudova: 2.400 KM.
- b) Za šefove odjeljenja općinskih sudova: 2.600 KM.
- c) Za predsjednike osnovnih sudova: 2.800 KM.
- d) Za predsjednike općinskih sudova sa 30 ili više sudija: 3.200 KM.
- e) Za predsjednike općinskih sudova sa 60 ili više sudija: 3.600 KM.
- f) Za sudije kantonalnih sudova: 3.000 KM.
- g) Za šefove odjeljenja kantonalnih sudova: 3.200 KM.
- h) Za predsjednike kantonalnih sudova: 3.400 KM.
- i) Za sudije Ustavnog suda Federacije Bosne i Hercegovine i sudije Vrhovnog suda Federacije Bosne i Hercegovine: 3.800 KM.
- j) Za šefove odjeljenja Ustavnog suda Federacije Bosne i Hercegovine i Vrhovnog suda Federacije Bosne i Hercegovine: 4.000 KM.
- k) Za predsjednike Ustavnog suda Federacije Bosne i Hercegovine i Vrhovnog suda Federacije Bosne i Hercegovine: 4.400 KM.